

Efesus 2:2 E bakto ganeka sampeyan noro' ka sadajana kabiysa'anna dunnya paneka; artena sampeyan atoro' ka pangobasana langnge', enggi paneka erroh se samangken ngobasae atena reng-oreng se ta' ngestowagi papakonna Jehovah.

Matiyus 6:10 Karaja'annepon Junandalem moga dhatengnga. Karsaepon Junandalem moga kalakona e bume akadi e sowarga.

Lukas 22:42 laju asojud tor adu'a, "Rama," dhabuna, "manabi kengeng, jauwagi dhari abdidalem kasangsara'an se kodu etanggung abdidalem ka'dhinto'. Banne menorot pangaterro abdidalem, namong kasokannepon Junandalem."

Yahya 16:7-9 Tape Sengko' ngoca'a sabendherra ka ba'na: Ka ba'na lebbi bagus mon Sengko' mangkat; sabab mon Sengko' ta' mangkat, Panolong rowa ta' kera rabu ka ba'na. Tape mon Sengko' mangkat, Sengko' ngotosa Erroh jareya ka ba'na. 8 Erroh jareya mon la rabu bakal anyata'agiya ka dunnya reya se sabendherra artena dusa, pa-apa se bendher, ban parkara okomanna Jehovah. 9 Erroh jareya bakal anyata'agiya ja' ta' parcaja ka Sengko' reya dusa;

2 Timotiyus 2:10 Jareya sababba sengko' sabbar nanggung jareya kabbi kaangguy kaparlowanna reng-oreng se epele bi' Jehovah, sopaja reng-oreng jareya padha narema kasalameddan se eparengngagi kalaban parantara'anna Isa Almasih, se etoro'e kamolja'an se langgeng.

Roma 15:20,21 Pangaterro kaula enggi paneka aberta'agiya Kabar Bagus dhari Jehovah e sadajana kennengnganna oreng se gi' ta' mereng parkara Almasih. Sabab kaula ta' poron alalakon materros dhasar se epasang oreng laen. 21 E dhalem Alketab esepputtagi, "Reng-oreng se gi' ta' tao narema berta parkara Salerana, bakal nangaleyana; ban reng-oreng se gi' ta' tao ngedhing, bakal ngarteya."

Caretana Para Rasul 2:36,37 Ganeka sababba aponapa me' sadajana oreng Isra'il kodu ngagali onggu ja' Isa se esalib sampeyan ganeka enggi paneka Isa se sareng Jehovah epadaddi Pangeran sareng Rato Panyalamet!" 37 E bakto reng-oreng jareya padha ngedhing parkara jareya, laju padha ngalengsang, daddi pas mator ka Petrus ban sul-rasul laenna, "Tan-taretan, daddi kaula paneka kodu kadi ponapa?"

Ibrani 4:2 Sabab Kabar Bagus paneka ampon ebanta'agi ka sampeyan sareng kaula sadaja akadi se aberta'agi ka reng-oreng ganeka. Nangeng ka reng-oreng ganeka berta gella' tadha' gunana. Sabab e bakto mereng,

reng-oreng ganeka ta' parcaya.

Yeremiya 24:7 Bi' Sengko' epaterrowa ngarteya ja' Sengko' reya PANGERAN. Daddi reng-oreng jareya bakal daddiya Tang ommat, ban Sengko' daddiya Jehovahna, sabab reng-oreng jareya abaliya ka Sengko' kalaban gu-onggu ate.

Matiyus 22:37 Dhabuna Isa, "Taresnae Jehovahna ba'na sampe' ka dhalem atena, sampe' nyarepsep ka sokmana, kalaban ngettokkagi akkalla. 38 Jareya parenta se paleng otama ban se paleng parlo!

Caretana Para Rasul 16:14 Badha settong e antarana se adagang kaen bungo terrong, nyamana Lidiya, dhari Tiatira. Babine' jareya taresna ka Jehovah, daddi bi' Pangeran atena eparenge tabukka' sopaja endha' narema apa se ejarragi bi' Paulus.

Matiyus 13:14-16 Daddi la kalakon apa se eramallagi Nabbi Yesaya: 'Jehovah adhabu: Reng-oreng jareya ngedhingngagi tape ta' ngarte; reng-oreng jareya terros ngabassagi tape ta' nangale'e pa-apa. 15 Sabab pekkeranna reng-oreng jareya la tompol, kopengnga la kopok ban matana la epameddem. Kan epakantha jareya sopaja matana ta' nangale, kopengnga ta' ngedhing, pekkeranna ta' ngarte ban ta' abali ka Sengko', sarta pas epabarasa bi' Sengko.' 16 Tape ba'na pojur onggu," dhabuna Isa pole ka para panganodda, "sabab ba'na nangale ban ngedhing onguwan.

Yesaya 6:9,10 Pangeran laju ngotos sengko' esoro manapa' pessen reya ka ommat, "Maske ba'na terrosa ngedhingngagi, ba'na ta' kera ngarte. Maske ba'na terros netene, ba'na ta' kera tao badha kadaddiyan apa." 10 Salerana laju adhabu ka sengko', "Patopo pekkeranna reng-oreng jareya, pakopok kopengnga ban pabuta matana, me' olle reng-oreng jareya ta' nangale, ta' ngedhing ban ta' ngarte, sopaja pas padha abalik nyabis ka Sengko', ban Sengko' pas epabarasa."

Caretana Para Rasul 28:27 Sabab pekkeranna bangsa reya la tompol, kopengnga la kopok, matana epameddem. Jareya kalakon sopaja bangsa reya matana ta' nangale, kopengnga ta' ngedhing, pekkeranna ta' ngarte, ban bangsa jareya ta' abali ka Sengko', ban bi' Sengko' pas epabarasa.

Markus 4:11,12 "Ba'na la eparenge tao rosevana parkara baramma Jehovah marenta," dhabuna Isa. "Tape reng-oreng lowar ejari ngangguy parompama'an, 12 sopaja 'Reng-oreng jareya bakal terrosa ngabassagi tape ta' tao badha kadaddiyan apa, reng-oreng jareya bakal terrosa ngedhingngagi, tape ta' ngarte, jareya kalakon sopaja reng-oreng jareya ta' nangale'e ban ta' ngarte ban ta' entar ngadhep ka Jehovah ban Jehovah ta' nyapora dusana.' "

Yahya 12:39,40 Daddi reng-oreng jareya ta' bisa parcaja, sabab Yesaya la adhabu keya, "Jehovah adhabu, 40 'Bi' Sengko' reng-oreng jareya epabuta matana, epatopo pekkeranna; sopaja matana ta' nangale'e, ban pekkeranna ta' ngarte. Sopaja reng-oreng jareya ta' abali ka Sengko', saellana jareya bi' Sengko' pas epabaras.' "

Roma 11:7,8 Daddi kadi ponapa? Ommat Isra'il ta' ngaolle se esare aba'na. Se ngaolle ganeka namong reng-oreng peleyanna Jehovah, se namong sakone'. Se laen cengkal ta' poron merengngagi tembalanna Jehovah. 8 Sabab e dhalem Alketab esebuttagi kantha reya, "Ate ban pekkeranna reng-oreng jareya bi' Jehovah epabudhu; ban sampe' sateya reya matana reng-oreng jareya ta' bisa nangale'e ban kopengnga ta' bisa ngedhing."

2 Tesalonika 2:10,11 Oreng ganeka bakal nepowa kalaban cara se jahat se acem-macem kaangguy manyalethong reng-oreng se bakal tompessa. Reng-oreng ganeka bakal tompessa polana ta' poron ka berta se lerres dhari Jehovah se madhateng kasalameddan ka aba'pon. 11 Lantaran ganeka Jehovah madhateng ka reng-oreng ganeka settong kobasa se manyalethong oreng, kantos sadaja padha parcaja ka barang se ta' lerres.

Matiyus 13:18-23 "Edhingngagi apa artena parompama'anna oreng se nabur jarowa. 19 Ne-bine se gaggar e lorong rowa parompama'anna oreng se ngedhing kabar parkara baramma Jehovah se marenta, tape ta' ngarte. Se Jahat dhateng arampas pa-apa se la etabur e dhalem atena. 20 Ne-bine se gaggar e kennengngan se bannya' batona, parompama'anna oreng se ngedhing kabar jareya, terros etarema kalaban senneng ate. 21 Tape kabar jareya ta' aramo' e dhalem atena, daddi ta' abit cekka'na. Buru nemmo kasossa'an otabana ekaneyaja oreng polana kabar jareya, pas mortad. 22 Ne-bine se gaggar e ombut se bannya' dhurina parompama'anna oreng se ngedhing kabar jareya, tape kobater parkara odhi'na dibi' sarta terro odhi'a mewah. Daddi kabar dhari Jehovah tacecce' e dhalem atena sampe' ta' abuwa. 23 Ban ne-bine se gaggar e tana se landhu parompama'anna oreng se ngedhing kabar jareya sarta paham ka essena. Ne-bine jareya abuwa bannya', badha se hasella saratos kalena, badha se sabidak kalena, ban badha se tello polo kalena."

2 Korintus 3:15,16 La'-mala' samangken, mon reng-oreng ganeka maca tab-ketabba Mosa, dhung-kodhung ganeka gi' notobi pekkeranna reng-oreng ganeka. 16 Nangeng mon oreng ngadhep ka Pangeran, dhung-kodhung ganeka bakal esengkaba dhari mowana.

Hoseya 11:3-7 Mangkana Sengko' se ngajari Isra'il ajalan, ban se e dhalem taresna agellu' aba'na. Sengko' se arabat aba'na tape aba'na ta' endha'

ngakone jareya. 4 Kalaban kataresna'an se tadha' batessa, bi' Sengko' Isra'il epasemma' ka Sengko'. Sakabbinna kasangsara'anna bi' Sengko' epadhammadang, Sengko' lamba' aberri' kakan ka Isra'il jareya. 5 Reng-oreng Isra'il jareya ta' endha' abali ka Sengko', daddi bangsa jareya kodu abali ka Messer, ban bakal eparenta'a bangsa Asyur. 6 Paperrangan bakal rabaga sampe' ka dhalem tha-kotthana, bang-labang saketheng bakal eparosaga, dineng Tang ommat bakal epamateya. Se daddi sababba kadaddiyan jareya polana oreng Isra'il norodi karebba dibi', 7 ban maksa nyengla'ana Sengko'. Daddi oreng Isra'il jareya bakal etendhessa, tape tadha' oreng se nolonga maske reng-oreng Isra'il jareya rat-tharadan se menta tolong."

Matiyus 11:28-30 Mara nyander ka Sengko' ba'na kabbi se lesso, sarta nanggung berra'na odhi'; bi' Sengko' ba'na epaseggerra. 29 Mara toro' Tang parenta ban ajar dhari Sengko'. Sabab Sengko' reya alos ban andhap asor, daddi ba'na bakal arassa'a segger. 30 Sabab Tang tarenta masenneng, ban kasossa'an se bi' Sengko' epekollagi ka ba'na dhammadang.

Caretana Para Rasul 26:18 ba'na kodu mokka' matana reng-oreng jareya sopaja kalowar dhari pettengnga sarta maso' ka terrangnga, sopaja sabangsa jareya lopoda dhari kakobasa'anna Iblis ban ekobasae Jehovah, sopaja kalaban parcaja ka Sengko' reng-oreng jareya bakal esapora'a sarta bakal daddiya anggotana ommat peleyanna Jehovah.

2 Timotiyus 2:24-26 Oreng se ngabdi ka Pangeran ta' patot atokaran; kodu laba ka sapa'a bai, bisa ngajar oreng kalaban bagus ban sabbar. 25 Paalos mon ngajar reng-oreng se dujan alaban; sabab olle daddi oreng jareya bi' Jehovah eparenge kasempadan atobat ban laju kennal ka pangajaran se teppa'. 26 Kalaban cara se kantha jareya reng-oreng jareya tanto pas enga' pole, ban kalowar dhari jebbagga Iblis se ngobasae reng-oreng jareya ban se maksa sopaja noro' karebba.

Wahyu 3:17-19 Ba'na ngoca', 'Sengko' sogi ban sabarang cokop, ta' kakorangan pa-apa.' Tape ba'na ta' tao ja' kabadha'anna ba'na ce' malaradda ban ce' mellassa! Ba'na mesken, abangkang, ban buta. 18 Daddi bi' Sengko' ba'na ebala'ana, mara melle emmas ka Sengko', iya areya emmas se morne, me' olle ba'na sogi. Melle keya kalambi pote ka Sengko', me' olle ba'na akalambi ban notobi badanna se abangkang ban matodhusan. Ban melle keya tamba buliddagi ka matana me' olle ba'na nangale'e. 19 Reng-oreng se ekaneserre Sengko', jareya se bi' Sengko' egigiri ban epeccot. Daddi mara padha pasamangat, ban atobat dhari sadusana.

2 Korintus 7:10 Sabab kasossa'an se kadi gapaneka ngasellagi obana ate

se madhateng kasalameddan. Ban oreng ta' kera kasta polana ganeka. Sabaligga, kasossa'an se coma sajalan sareng karebba manossa ngasellagi pate.

1 Ratona - 1 To-Rato 18:37 Ngereng peyarsa'agi, GUSTE! Parenge jawaban abdidalem, GUSTE, sopaja ra'yat ka'dhinto oneng ja' Junandalem ka'dhinto Jehovah, sarenggan pole manabi Junandalem se mabali reng-oreng ka'dhinto ka Junandalem."

2 Korintus 4:4 Illah se jahat se ngobasae dunnya paneka nopowe pekkeranna reng-oreng se ta' parcaja ganeka. Illah se lang-ngalange reng-oreng ganeka sopaja reng-oreng ganeka ta' nengale terrang dhari Kabar Bagus ganeka parkara kaagunganna Almasih, gambaranna Jehovah.

Lukas 8:11-15 "Areyal artena parompama'an jareya: Ne-bine jareya dhabuna Jehovah. 12 Ne-bine se gaggar e lorong jareya marabut reng-oreng se ngedhing dhabuna Jehovah jareya. Tape Iblis dhateng laju arampas jareya dhari atena, sopaja reng-oreng jareya ta' parcaja ban ta' epasalamet. 13 Ne-bine se gaggar e kennengangan se bannya' batona jareya marabut oreng se e bakto ngedhing kabar jareya, narema kabar jareya kalaban ate senneng. Tape kabar jareya ta' aramo' e dhalem atena. Se parcaja pera' sakejja'; e bakto dhateng coba laju mortad. 14 Ne-bine se gaggar e tengngana ombut se bannya' dhurina marabut oreng se ngedhing kabar jareya, tape kobater mekkere odhi'na ban terro sojiya sarta terro sennengnga e dunnya reya. Daddi kabar buru tacecce' sampe' ta' ngasellagi buwa se massa'. 15 Ne-bine se gaggar e tana se landhu marabut oreng se ngedhing kabar jareya, laju esempen e dhalem atena se bagus ban jujur, ban terros paggun badha e dhalem atena jareya sampe' ngasellagi buwa."

Caretana Para Rasul 15:11 Sabaligga, sampeyan sareng kaula parcaja, ban epasalamet polana bellas asena Guste Isa; sapaneka jugan reng-oreng ka'issa'.

Roma 8:13 Sabab manabi sampeyan odhi' menorot tabi'adda manossa, sampeyan bakal seda'a; nangeng manabi kalaban kobasana Errohna Jehovah, sampeyan terros saos mate'e kon-lalakonna sampeyan se dusa, ban sampeyan bakal odhi'a.